

Wartawan buat kerja nakal tulis surat

Daripada BAHAROM MAHUSIN

LONDON 26 Jun — Seorang wartawan akhbar *The Sunday Telegraph* membuat kerja nakal menulis surat kepada 194 ketua negara dan ketua kerajaan di dunia meminta gambar potret mereka yang lengkap dengan tandatangan.

Hari ini akhbar itu menyiarkan sebahagian daripada 52 gambar yang wartawan itu perolehi lengkap dengan komen-komen yang mengarat tentang diri dan karektor pemimpin-pemimpin itu.

Wartawan itu, **Alex Bellos**, membawa gambar-gambar yang diterimanya kepada orang yang didakwa adalah pakar imej dan pengkaji tandatangan untuk mengulas tentang diri pemimpin-pemimpin dunia yang membalas suratnya.

Perdana Menteri Malaysia, Datuk Seri Dr. Mahathir Mohamad adalah salah seorang daripada pemimpin-pemimpin berkenaan selain Canselor Jerman, Helmut Kohl, Presiden Perancis, Francois Mitterrand, Perdana Menteri Britain, John Major, Perdana Menteri Israel, Yitzhak Rabin dan Perdana Menteri India, Narasimha Rao.

Selain mereka, akhbar itu menyiarkan 31 keping gambar pemimpin dunia yang lain daripada gambar Presiden Trinidad dan Tobago, Noor M. Hassanali membawa kepada potret Presiden Romania, Ion Iliescu.

Rencana dalam *The Sunday Telegraph* itu lengkap dengan maklumat berapa cepat setiap pemimpin itu membalas surat Bellos. Paling cepat ialah Perdana Menteri Belanda iaitu lima hari dan paling lewat Chile — 100 hari.

Dr. Mahathir

Dr. Mahathir, menurut rencana itu, membalas surat Bellos dalam tempoh 37 hari. Bellos menyamar kononnya dia berminat dengan sesebuah negara dan akan gembira jika dapat menampal gambar pemimpin negara itu pada dinding biliknya.

Antara komen-komen yang tersiar dalam *The Sunday Telegraph* hari ini ialah rupa Perdana Menteri India, Narasimha Rao seperti *yogi flyer* dan beliau kelihatan seperti sakit.

Putera Hans-Adam 11 dan Puteri Marie dari Liechtenstein memberikan gambar mereka tetapi komen yang diterima ialah gambar itu seperti "iklan mencari jodoh".

Rupa Presiden Republik Czech, Vaclav Havel pula dikatakan seperti "pengurus bank yang merasa tidak senang kerana terpaksa menolak permohonan pinjaman". Presiden Poland, Lech Walesa digambarkan sebagai "pemandu bas yang sedang menghadapi tribunal".

Rencana itu jelas menunjukkan sikap tidak adil. Hampir semua negara pemimpin Barat dan sekutu Barat mendapat alasan yang baik seperti Yitzhak Rabin, Helmut Kohl, Mitterrand, Perdana Menteri Ireland, Albert Reynolds dan Perdana Menteri Canada, Jean Chretien.

Pemimpin-pemimpin negara sedang membangun diberi alasan yang penuh jenaka, kasar dan menjatuhkan air muka pemimpin berkenaan. Presiden Bolivia yang bersusah payah mengirimkan gambar atas permintaan Bellos dikatakan seperti "hos rancangan kuiz televisyen".

Dr. Mahathir mengirimkan gambar beserta tandatangan. Analisis akhbar itu ialah beliau seorang "yang tangkas berfikir dan tidak suka membuang masa tetapi suka mengelak, tidak terlalu terbuka kepada orang, idea atau perkara baru."